

DAGING

AWIG-AWIG DESA PAKRAMAN PANCA MANDALA GITA

MURDHA CITTA	
PRATAMAS SARGAH : ARAN LAN WAWIDANGAN DESA	1
DWITISYAS SARGAH : PATITIS LAN PAMIKUKUH	1
TRITIYAS SARGAH : SUKERTA TATA PAKRAMAN	2
Palet 1 Indik Warga lan Krama Desa	2
Palet 2 Indik Prajuru Desa	7
Palet 3 Indik Kulkul	9
Palet 4 Indik Sangkepan lan Paruman	11
Palet 5 Indik Druwen Desa	13
Palet 6 Indik Sukerta Pamitegep	14
Kaping 1 Indik Karang lan Tegal	14
Kaping 2 Indik Kakayonan	16
Kaping 3 Indik Wawangunan	17
Kaping 4 Indik Wawalungan	18
Kaping 5 Indik Bhaya lan Dusta	19
Kaping 6 Indik Pangunyan Desa.....	21
CATURTHAS SARGAH : SUKERTA TATA AGAMA	22
Palet 1 Indik Dewa Yadnya	22
Palet 2 Indik Resi Yadnya	26
Palet 3 Indik Pitra Yadnya	26
Palet 4 Indik Manusa Yadnya	31
Palet 5 Indik Buta Yadnya	32
PANCAMAS SARGAH : SUKERTA TATA PAWONGAN	33
Palet 1 Indik Pawiwahan	33
Palet 2 Indik Nyapihan	37
Palet 3 Indik Sentana	39
Palet 4 Indik Warisan	41
SADTHAS SARGAH : WICARA LAN PAMIDANDA	43
Palet 1 Indik Wicara	43
Palet 2 Indik Pamidanda	44
SAPTAMAS SARGAH : NGUWAH-NGUWUHIN AWIG-AWIG	45
ASTAMAS SARGAH : SAMAPTA	46

Murdha Citta

Om Swastyastu namo siddham.

Malarapan saking panghyangning Ida Sanghyang Widhi Wasa asung nugraha ngawentenang kahuripan sakala niskala ring bhuwana agung lan bhuwana alit. Manut dresta desane pinaka pasayuban krama desa rawuhing kulawarga pawongannia. Desane kasinanggeh bhuwana agung, pawongannia sowang-sowang pinaka bhuwana alit.

Sotaning bhuwana agung, desane kasinanggeh bhawa mahurip jangkep saha Tri Hita Karanannia lwire:

- ha. Parhyangan, sahananing kahyangan panyiwian desa genah ngarcana Ida Hyang Parama Wisesa maka jiwana desane.
- na. Pawongan, sakatahing krama lan warga desa pinaka bhayu pramana, mawinan desane sidha molah maprawerti.
- ca. Palemahan, tanah kakuwuban desa sinanggeh pinaka sthula sariran desane.

Adung patemoning bhuwana agung lan bhuwana alit, maka larapan ngulati santha jagadhita, sinanggeh murddhaning prayojana pangriptaning awig-awig ring paseban krama desa, pinaka sepat siku-siku pamanut pamargin desa pakraman.

Dumadak prasidha pangaptin titiang sami, angidep mwan amagehaken kadi linging awig-awig puniki.

Om Santih Santih Santih Om.

PRATHAMAS SARGAH

ARAN LAN WAWIDANGAN DESA

Pawos 1

- (1) Desa pakraman puniki mawasta Desa Pakraman Panca Mandala Gita.
- (2) Jebar kakuwub wawidangannia mawates nyatur sakadi ring sor:
 - ha. Sisi Kangin : Banjar Limo;
 - na. Sisi Kelod : Banjar Rata lan Desa Pakraman Tri Wahana Dharma;
 - ca. Sisi Kauh : Desa Pakraman Klumpu;
 - ra. Sisi Kaler : Desa Pakraman Ped.
- (3) Desa Pakraman Panca Mandala Gita kawangun antuk gebogan krama tur kapalih dados enem banjar, luire:
 - ha. Banjar Baledan Duur;
 - na. Banjar Baledan Beten;
 - ca. Banjar Iseh;
 - ra. Banjar Bila;
 - ka. Banjar Waru;
 - da. Banjar Sidewayah.

DWITISYAS SARGAH

PATITIS LAN PAMIKUKUH

Pawos 2

Desa Pakraman Panca Mandala Gita ngamanggehang pamikukuh makadi:

- ha. Pancasila;
- na. Undang-undang Dasar 1945;
- ca. Tri Hita Karana manut sadacara agama Hindu.

Pawos 3

Luir patitis Deśa Pakraman Panca Mandala Gita sakadi ring sor:

- ha. Mikukuhang mwan ngarajegang Sanghyang Agama;
- na. Nginggilang tata prawertining magama;
- ca. Ngarajegang kasukerthan Desa saha pawongannia sakala lan niskala.

TRITIYAS SARGAH

SUKERTHA TATA PAKRAMAN

Palet 1

Indik Warga lan Krama .

Pawos 4

- (1) Sane kabawos warga Desa Pakraman Panca Mandala Gita, inggih punika sang sapasira ugi sane magama Hindu, jumenek ring wawidangan Desa Pakraman Panca Mandala Gita kantos langkung ring 35 rahina.
- (2) Sane kabawos krama Desa Pakraman Panca Mandala Gita, inggih punika warga desa sane sampun wyadin nahenin alaki rabi, sareng nyungsung kahyangan desa tur satinut ring sadaging awig-awig mwan pararem Desa Pakraman Panca Mandala Gita, yadyastun jenek magenah ring dura desa.
- (3) Sajaba sane kabawos ring ayat (1) lan (2) kocaping ajeng, kabawos tamyu sane rawuh manut jalarannia sowang-sowang.

Pawos 5

Krama Desa Pakraman Panca Mandala Gita kabhinayang sakadi ring sor:

- ha. Krama Ngarep, inggih punika krama desa sane kantun jangkep alaki rabi tur jumenek ring wawidangan Desa Panca Mandala Gita:

- na. Krama Balu, inggih punika krama desa sane pecak jangkep alaki rabi, salanturnia sinalih tunggil ninggal lampus utawi nyapihan;
- ca. Krama Kaputungan, inggih punika krama desa sane kantong jangkep alaki rabi tan madrebe oka sasampun mayusa 60 warsa;
- ra. Krama Ngumbara Desa, inggih punika krama desa sane jumenek magengah ring dura desa.

Pawos 6

- (1) Jalaran mwang panemaya tedun makrama desa kamanggehang sakadi ring sor:
 - ha. Majalaran antuk pawiwahan;
 - na. Majalaran antuk pinunas, katiwakang majeng ring sang pecak tan makrama desa ring desa Pakraman Panca Mandala Gita manut kabuatannia mapinunas pacang tedun dados krama Desa Pakraman Panca Mandala Gita;
 - ca. Majalaran antuk tutug waneng jumenek, katiwakang majeng ring tamyu sane magama Hindu sane jumenek ring wawidangan Desa Pakraman Panca Mandala Gita langkung ring 35 rahina, tur sampun nahen kapakelingin olih prajuru desa.
- (2) Jalaran sakadi mungguh ring ayat (1) aksara ca tan katiwakang majeng ring tamyu sane rawuh sangkaning sasudian desa utawi sasudian Guru Wisesa, sajaba gumanti tamyu inucap mapinunas pacang tedun makrama desa.
- (3) Panemaya nedunang makrama desa wenten kalih pawos, lwire:
 - ha. Yan sangkaning pawiwahan, rikala pawiwahannia manggihin Galungan;
 - na. Sangkaning pinunas utawi waneng jumenek, kamargiang rikala sangkepan desa riwus pinunasnia utawi tutug wanengnia 35 rahina.

Pawos 7

- (1) Swadharmaning krama Desa Pakraman Panca Mandala Gita kamanggehang sakadi ring sor:
 - ha. Patut nyungkemin tur ninutin sadaging awig-awig mwanng pararem Desa Pakraman Panca Mandala Gita;
 - na. Patut sareng nyungsung wyadin ngempon sahananing kahyangan sane kamanggehang pinaka panyiwian Desa Pakraman Panca Mandala Gita;
 - ca. Patut dredha ngamargiang sakancan ayah-ayah mwanng pakenan-kenan krama manut ungguhan pakramannia sowang-sowang.
- (2) Tategenan krama Desa Pakraman Panca Mandala Gita sakadi ring sor:
 - ha. Krama Ngarep wenang keni ayah-ayah, peson-peson miwah urunan mamungkul;
 - na. Tategenan Krama Pangele, Kaputungan, Krama Tapukan, Krama Balu mwanng Krama Ngumbara desa kamanggehang manut pararem.
- (3) Anak-anaking krama desa sane sampun kasinanggeh mungguh deha wyadin teruna patut ngamiletin sekaa teruna, salanturipun kadadosang ngamargiang ayah-ayah krama pinaka suksukan.
- ✓(4) Prade ring desa pakraman wenten pakaryan desa sane abot, patut karemba antuk krama lan warga desa sami.
- (5) Prade wenten krama utawi warga desa tan satinut ring kecaping ayat (1), (2), (3), lan (4), wenang katiwakin pamidanda manut pararem.

Pawos 8

- (1) Krama sane wenang polih laluputan pamargi utawi ayah-ayahan, lwire:
 - ha. Para pamangku desa.
 - na. Prajuru lan pacalang desa.
 - ca. Krama sane cedangga banget utawi sungkan tahunan.

ra. Krama ubuh utawi krama tapukan, sadurung mayusa 17 warsa.

ka. Krama balu.

(2) Laluputan inucap maunadika sakadi ring sor:

ha. Para pamangku luput ayah-ayahan, peson-peson, miwah urunan.

na. Prajuru lan pacalang polih luput wedal-wedalan raramon kewanten.

ca. Krama sane cedangga banget lan sungkan tahunan polih luput manut pararem.

ra. Krama balu luh luput ayahan lanang, krama balu lanang polih luput ayahan istri.

ka. Krama ubuh lan tapukan polih luput manut pararem.

Pawos 9

(1) Wusan makrama desa majalaran sakadi ring sor:

ha. Seda.

na. Kesah ka dura desa saking rahayu, maduluran antuk ilikita saking prajuru desa.

ca. Sampun nyada manut jalarannia;

ra. Kawusanang utawi kadaut pipilnia sajeroning paruman desa riantukan kasinanggeh banget kasisipannia ring desa.

(2) Wusan utawi ngusanang krama, panemayannia padgatakala manut pararem.

(3) Sang wusan makrama desa tan wenang polih pah-pahan sakancan druwen desa nanging kapatutang mangda ngawaliang artha brana druwen desa sane kantun karaksa.

(4) Prade sang sampun wusan makrama desa malih mapinunas pacang mawali makrama, patut katarima manut sulur sakadi ring sor:

ha. Yaning wusannyane rihin sangkaning rahayu, kapatutang nawur panaub wawangunan manut pararem;

na. Yaning wusannyane sangkaning tan rahayu, sajaba keni panaub wawangunan kadi kocaping ajeng wenang taler katiwakin pamidanda ular-alir manut pararem risampune nunas pangampura sajeroning paruman krama desa;

Pawos 10

(1) Sajeroning midabdabin tamyu sane rawuh ka Desa Pakraman Panca Mandala

Gita, desa pakraman ngamanggehang uger-uger sakadi ring sor:

ha. Manut agamannia, tamyu kabhinayang dados kalih soroh, luire:

1. Tamyu sane magama Hindu.
2. Tamyu sane magama syosan ring Hindu.

na. Tamyu sane jumenek langkung ring 35 rahina ring Desa Pakraman Panca Mandala Gita kapidabdabin sakadi ring sor:

1. Tamyu magama Hindu sajabaning sasudian desa utawi sasudian Guru Wisesa sasampune nahen kapakelingin indik waneng inucap, wenang katedunang makrama desa manut tata cara sane kamanggehang sajeroning pararem;
2. Tamyu sasudian desa utawi sasudian Guru Wisesa, tan ugi mangda tedun makrama desa, nanging kapatutang mangda nawur dana punia ka desa manut pararem;
3. Tamyu sane magama siyos ring Hindu patut nawur jinah pasukadukaan manut pararem.

(2) Sahananing tamyu ugi mangda nyerahang ilikita indik padewekannia utawi tatujon pangrawuhnia majeng ring prajuru desa

(3) Sahananing tamyu patut satinutin ring tata sukerta Desa Pakraman Panca Mandala Gita. Yan tan satinut, wenang tan polih pangayoman saking desa tur kakesahang saking Desa Panca Mandala Gita.

- (4) Krama utawi warga desa sane nampi tamyu pacang marerepan, patut midabdabin tamyunia makadi:
- ha. Nyadokang tamyu inucap ring prajuru desa saha ngaturang ilikita indik kasinahan tamyu punika;
 - na. Miteketin tamyu punika indik tata sukerta sane patut katinutin salawasnya magenah ring Desa Panca Mandala Gita.
- (5) Prade sang nampi utawi ngaraksa tamyu lenga punapi malih gumana piwal ring pamargi sakadi kocaping aksara ha miwah na ring ajeng, yan mabukti riwekas tamyu inucap malaksana tan patut, wenang sang nampi katiwakin pamidanda manut pararem.

Palet 2

Prajuru Desa

Pawos 11

- (1) Desa Pakraman Panca Mandala Gita kaenter olih Bendesa Pakraman kasanggra antuk:
- ha. Patajuh pinaka wakil;
 - na. Panyarikan pinaka juru surat;
 - ca. Patengen pinaka juru raksa;
 - ra. Kasinoman pinaka juru arah.
- (2) Krama banjar kaenter olih Kelihan Banjar.
- (3) Gaguat sang pacang kaadegang dados prajuru desa sakadi ring sor:
- ha. Mawiwit saking krama ngarep;
 - na. Jujur tur polos;
 - ca. Maparisolah becik tur tan cedangga;
 - ra. Uning ngawacen lan nyurat;
 - ka. Uning ring panglokika lan wicaksana.

- (4) Nyudi lan ngadegang prajuru patut kalaksanayang olih krama sajeroning paruman.
- (5) Waneng dados prajuru desa kamanggehang wantah 5 warsa, tur dados kasudi malih apisan.

Pawos 12

- (1) Swadharmaning Bendesa Pakraman luire:
 - ha. Ngenter pamargin Desa Pakraman manut awig-awig miwah pararem desa;
 - na. Nuntun tur ngenterang krama ngupadi kasukertan krama manut patitis desa;
 - ca. Mawosin wicaran krama utawi warga desa, saha niwakang pamutus lan pamidanda manut kecaping awig-awig mwanng pararem desa;
 - ra. Pinaka saksi rikala wenten krama ngawentenang yadnya manut kabuatan utawi pinunas;
 - ka. Pinaka duta Desa Pakraman rikala ngawentenang babawos ring sapisira ugi.
- (2) Sajeroning ngenterang pamargin Pakraman, Bendesa Pakraman patut ngawentenang pawirasan ring prajuru, kasarengin antuk para yogya sane wenten ring Desa Pakraman Panca Mandala Gita mangda tan singsal pamargi.
- (3) Prade wenten sinalih tunggil prajuru iwang pamargi makadi ngalinyokang druwen desa mwanng sapanunggilannia tur keni kabuktiang kaiwangannia, punapi malih banget tempal ring kecaping awig-awig utawi pararem, patut keni pamidanda artha manut pararem, tur patut kausanang dados prajuru.
- (4) Prajuru sane kasisipang tan kapatutang ngenter pamargin paruman krama jantos wenten pamutus sane pastika indik kaiwangan muang pamidandannia.

Pawos 13

Olih-olihan prajuru desa luire kadi ring sor:

- ha. Polih cacenengan saluiring duman ring desa;
- na. Polih olih-olihan siosan manut pararem.

Pawos 14

(1) Prajuru desa kagentosin riantukan:

- ha. Seda;
- na. Sampun tutug panemaya dados prajuru;
- ca. Tan prasida ngamargiang swadharmaning prajuru duaning katiben sungkan rahat utawi pialang abot siosan manut panglokika paruman desa;
- ra. Pinunas ngaraga tur sampun kalugra pinunasnia antuk paruman krama;
- ka. Kanorayang antuk paruman duaning iwang pamargi.

(2) Ngararyanang utawi ngentosin prajuru patut kasungkemin antuk paruman krama.

Palet 3

Indik Kulkul

Pawos 15

(1) Kulkul sane wenten ring Desa Pakraman Panca Mandala Gita luire:

- ha. Kulkul Desa ;
- na. Kulkul Banjar;
- ca. Kulkul Pura;
- ra. Kulkul Sekaa-sekaa.

(2) Suaran kulkul kasinanggeh pinaka suaraning desa utawi sekaa, satmaka atur utawi dadawuhan saking prajuru majeng ring kramannia sami.

(3) Tabuh tatepakan kulkul inucap patut pastika manut tatujon tur manut ring pasubhayan kramannia.

(4) Pamargi sane patut macihna antuk suaran kulkul luire:

- ha. Pacang sangkep utawi parum;
 - na. Tedun makarya utawi ngayah;
 - ca. Pacang ngarentebin utawi matatulung rikala wenten warga seda, marangkat utawi yadnya siosan manut kabuatan;
 - ra. Wenten kapancabhaya;
 - ka. Ngawitin utawi ngalebar catur bratha panyepian.
- (5) Tabuh suaran kulkul inucap manut tatujon:
- Ⓐ Tigang tuludan sedeng: cihna tedun ngayah utawi makarya, sangkep utawi parum lan ngawitin brata panyepian;
 - Ⓑ Limang klentungan sedeng ri kala wengi : cihna wenten warga ngerorod utawi ngrangkat;
 - ca. Pitung klentungan sedeng : ngarentebin kalayusekaran;
 - ra. Bulus sada panjang : cihna wenten kapancabhaya.
 - ka. Negteg utawi nyangsih : cihna wenten pamargin yadnya ring pura.

Pawos 16

- (1) Sane kapatutang nepek utawi nyuarayang kulkul sane wenten ring Desa Pakraman Panca Mandala Gita wantah prajurunnia sowang-sowang, utawi sang kapituduh olih prajuru inucap.
- (2) Sapasira ugi nyuarayang kulkul tan sangkaning pituduh saking prajurunnia sawawaning rikala wenten pancabhaya, wenang keni pamidanda manut pararem.
- (3) Sang nyuarayang kulkul cihna kapancabhayan patut manggeh nyantos ring genah kulkul inucap saha matur supeksa ring prajuru indik tatujon panepeknia.

Palet 4

Indik Sangkepan lan Paruman

Pawos 17

- (1) Sangkepan krama Desa Pakraman Panca Mandala Gita kawentenang nyabran ngasasih apisan nemonin rahina Anggara Kliwon, tan paarah-arah.
- (2) Sane patut kabaosang sajroning sangkepan luire:
 - ha. Munjuk lungsuring pakraman;
 - na. Sulus pamargin salwiring artha brana druen desa;
 - ca. Pamargin salwiring pamutus paruman sadurungnia;
- (3) Sangkepan Banjar, pangempon pura mwang sekaa-sekaa kamargiang manut drestannia sowang-sowang.

Pawos 18

- (1) Paruman sane wenten ring Desa Pakraman Panca Mandala Gita, luire:
 - ha. Paruman Prajuru Desa, kawentenang sanistannia nyabran 6 sasih apisan;
 - na. Paruman krama desa, kawentenang padgatakala manut kabuatan.
- (2) Paruman krama desa kangkat kamargiang yening krama desa sane nyarengin makatah tan kirang ring kalih pahtiga saking pigungan krama desane sami.
- (3) Dudonan pamargi rikala pacang ngawentenang paruman krama desa sakadi ring sor:
 - ha. Kamanggala antuk arah-arah, kalanturang antuk suaran kulikal;
 - na. Kakawitin antuk pamahbah saking Bendesa Pakraman kalanturang antuk macak krama. Yening krama sane rawuh tan manut ring gaguat sakadi kabawos ring ayat (2), paruman tan wenang kalaksanayang;
 - ca. Sadurung ngawitin babawosan indik unteng paparuman, kamargiang pangarcana ring Ida Bhagawan Panyarikan, masadana antuk cane, mwang canang pangrawos.

- (4) Painsikan sane patut kabawosang sajeroning paruman krama desa, luire:
- ha. Nyobyahang rarincikan prajuru sane patut polih panyungkem wyadin panyanggra saking krama desa;
 - na. Niwakang panepas wyadin pamidanda majeng ring wicaran warga desa sane patut kalaksanayang sajeroning paruman;
 - ca. Pamargi utawi painsikan padgatakala siyosan sane patut polih pamutus paruman.
- (5) Pamutus babawosan sajeroning paruman kamanggehang majalaran pamargi sakadi ring sor:
- ha. Madasar antuk paras-paros mabantang antuk kecap sastra, dresta, awig-awig lan pararem sane wenten sadurungnia;
 - na. Madasar antuk pawilangan swara prade tan prasida majalaran antuk paras-paros kadi kocaping ajeng.
- (6) Prade pamutus paruman kamanggehang antuk pawilangan swara, pamutus sane kamanggehang patut kasungkemin olih krama sane nyarengin paruman sanistanipun atenga langkung adiri.
- (7) Prade painsikan sane kabawosang sajeroning paruman tan sidha ngamolihang pamutus, prajuru patut nanggehang painsikan punika, tur kabawosang malih sajeroning paruman salanturnia.
- (8) Paruman prajuru desa matatujon sakadi ring sor:
- ha. Ngarincikang pangrencana sane pacang kabawosang sajeroning paruman krama;
 - na. Ngrancanayang laca-laca tatepasan majeng ring wicaran warga desa sane kasadokang ring prajuru, sadurung ngangkepang sang mawicara.
- (9) Pamutus paruman prajuru durung kangkat kamargiang sadurung kasungkemin antuk paruman krama desa.

Pawos 19

- (1) Tata trepti sane patut katinutin olih krama rikala sangkep utawi parum, sakadi ring sor:
- ha. Patut nganggen bhusana adat Bali jangkep;
 - na. Tan kapatutang utawi tan kalugra makta salwiring gagawan marupa sanjata;
 - ca. Tan kapatutang ngawetuang babawos banggras, sigug sane mawasana byota;
 - ra. Tan kapatutang malinggih ngenjuh huriin prajuru sane ngenter pamargin sangkepan utawi paruman.
- (2) Sang mamurug tata trepti kocaping ajeng, wenang keni pamidanda manut pararem.

Palet 5

Indik Druwen Desa

Pawos 20

- (1) Sane kamanggehang pinaka druwen desa Pakraman Panca Mandala Gita luire:
- ha. Kahyangan desa makadi Pura Puseh, Dalem lan Pura Desa rawuhing piranti-piranti sane wenten ring pura inucap;
 - na. Tanah tegak pura Kahyangan Desa, tegak Bale Desa miwah telajakannia;
 - ca. Tanah setra lan margi agung sane wenten ring wawidangan Desa Pakraman Panca Mandala Gita;
 - ra. Lelanguan, ilen-ilen gong lan sakaluirnia sane sampun mungguh ring ilikita;
 - ka. Druwen desa siosan sane kapikolihang salanturnia.
- (2) Sahananing druwen desa patut mangda kaungguhang ring ilikita sane pastika, tur kadambyakang sajeroning sangkepan utawi paruman.

- (3) Sahananing krama patut sareng nulingayang sakancan druwen desa kadi mungguh ring ilikita.
- (4) Tanah PKD pangoregnia kapidabdabin olih Desa Pakraman.

Pawos 21

- (1) Yan wenten sinalih tunggil krama utawi warga desa mamandung druwen desa, patut katiwakin pamidanda manut pararem tur ngwaliang sakancan barang sane kapandung.
- (2) Prade barang sane kapandung punika kasinanggeh barang sane suci, patut pamidannia kawewehin antuk pamrayascita manut kabuatan sane kaputusan antuk pararem.
- (3) Prade wenten druwen desa utawi pura ical tur tan wenten krama sane ngangken ngambil, wenang kramane sami katiwakin padewasaksian.
- (4) Prade rikala ngamargiang padewasaksian wenten krama tan prasida rawuh, patut matur piuning ring prajuru. Prajuru patut niwakang panglokika ring awinan sane kapiuningang tur niwakang tirtha padewasaksian majeng ring krama inucap.

Palet 6

Sukerta Pamitegep

Kaping 1

Karang lan Tegal

Pawos 22

- (1) Sahananing karang desa muang tanah tegak paumahan, patut mangda wenten wates ipun sane pastika sanistan ipun antuk papagehan.
- (2) Karang utawi tanah paumahan sane masanding, mungguing wates ipun kapidabdabin sakadi ring sor:

- ha. Wates sisi kaler, sisi kangin miwah sane nepi ring rurung utawi margi kakaryanin antuk sang ngamong karang inucap;
 - na. Wates sisi kelod, sisi kauh sajawaning sane nepi ring rurung utawi margi kakaryanin olih sang ngenahin karang panyanding sane delodan utawi dauhan;
 - ca. Prade sangkaning pada lila, kangkat kawentenang pamargi sios ring pamargi kocaping ajeng.
- (3) Prade wenten tegak karang paumahan sane kabebeng patut mangda kautsahayang mangda wenten marginnia sanistania apamaga sawatara adepa malarapan antuk paras-paros sareng panyandingnia, utawi nunas tatimbang ring prajuru.

Pawos 23

- (1) Sapasira ugi tan kapatutang malaksana sakadi ring sor:

- ha. Ngalahlah tegal wiadin karang druwen anak siosan, sajawaning wenten panguwak saking sang nrebenang;
- na. Ngalahlah margi, rurung, tegak banjar, tegak setra, mwang sakancan tegak sane kasinanggeh suci siosan.

- (2) Sang mamurug kecap ring ajeng, prade wenten ngawicarayang, patut kapidabdbabin sakadi ring sor:

- ha. Ngawaliang tanah sane kalahlah manut wates nyane rihin;
- na. Keni pamidanda panguwak manut pararem;
- ca. Upacara panyangaskara, prade genah sane kalahlah punika marupa genah sane kasinanggeh suci.

- (3) Krama utawi warga desa sane pacang ngadol tanah ring wawengkon Desa Panca Mandala Gita patut sadurungnia masadok ring prajuru. Prajuru patut ngutsahayang ngutamayang sang numbas sane mawiwit saking Desa Panca Mandala Gita.

Pawos 24

- (1) Sahanan warga Desa Pakraman Panca Mandala Gita patut sayaga miara kabersihan pakarangan mwang telajakannia, rauh ring margi utawi rurung manut tatiwak saking prajuru.
- (2) Sajeroning utsaha ngrajegang kabersihan wawengkon Desa Pakraman Panca Mandala Gita sowang-sowang pakarangan patut mangda:
 - ha. Wenten blumbang genah mis utawi luhu;
 - na. Maduwe jempeng utawi kakus;
 - ca. Yan makarya kandang bawi sajeroning pakarangan, mangda ugi kajangkepin antuk waduk utawi blumbang genah kotoran ipun;
 - ra. Tan makarya genah ngutang kotoran ring tepining margi utawi rurung.
- (3) Sang mamurug kecap ring ajeng, patut katiwakin pamidanda manut pararem risampune nahen kapakelingin olih prajuru desa.
- (4) Krama wyadin warga desa sane madrebe tegal, kaaptiang mangda mastikayang padrebeannia antuk ilikita marupa sertifikat saking Guru Wisesa.

Kaping 2

Indik Kakayonan

Pawos 25

- ✓ (1) Sapasira ugi ngawit pacang nandur kakayonan tanem tuwuh sane pacang dados mageng sajeroning pakarangan, patut paembang tatanduran punika saking wates karang tan kirang ring adepa agung ngajerowang.
- ✓ (2) Tanem tuwuh sane ngarebrebin utawi kasumangsayain pacang nyengkalen ka pisaga, wenang kawara madasar antuk paigum sane becik, mangda kakayonan punika gelis karebah utawi katebtebin.

- (3) Yan risampune kawara kadi ucaping ajeng sang nrebenang tan satinut utawi nenten nagingin pinunas sang ngawara, sang karebreban rumasa pacang kabhayanit kengin nyadokang ring prajuru banjar.
- (4) Prajuru banjar wenang mratyaksayang saha maweh panyepat pamutus harep ring sang madrebe kakayonan, mangda kakayonan sane kawara digelis karebah utawi katebtebin.

Kaping 3

Indik Wawangunan

Pawos 26

- (1) Sapasira ugi tan kapatutang makarya wawangunan nyapcap ka palemahan siyosan.
- (2) Wawangunan sane sampun wenten, sane kantun nyapcap ka pisaga mangda kautsahayang ngaryanang abangan sapatutnia.
- (3) Sapasira hugi tan tinut ring kecaping ajeng, risampune wenten pasadok ring prajuru wenang kaicen tatepasan kadasarin antuk paras-paros. Prade tatiwak saking prajuru taler tan katinutin kangkat wicara punika kaaturang ring sang rumawos tur sang mamurug awig-awig kakeninin pamidanda manut pararem.

Pawos 27

- (1) Wawangunan desa patut mangda kawangun ring tanah druwen desa saha kaprabeyanin olih krama desa.
- (2) Sapasira ugi tan kapatutang makarya wawangunan suci makadi pura, mesjid, gereja lan sakancannia ring wawengkon Desa Pakraman Panca Mandala Gita yan tan polih lugraha saking Desa Pakraman mwang para yogya salanturnia.

- (3) Sapasira ugi pacang makarya wawangunan nyanding pura Kahyangan Desa patut ngawilang paembang wawangunan punika saking wates panyengker pura sanistan ipun 5 meter.
- (4) Prade wenten wawangunan lawas sane paembangnia saking panyengker pura kirang ring 5 meter tan kapatutang makarya wawangunan matingkat.
- (5) Sapasira ugi tan satinut utawi mamurug kadi kecaping ring ajeng wenang katiwakin pamidanda manut pararem prade wenten nyadokang ring prajuru desa.

Kaping 4

Indik Wawalungan

Pawos 28

- (1) Krama wiadin warga desa sane miara wawalungan, patut sayaga nitenin wawalungannia makadi negul utawi ngalogor, mangda tan jantos ngarusak karang, pabianan, punapi malih jantos ngaletihin kahyangan.
- (2) Prade wenten wawalungan ngeleb, jantos ngrusak pabianan utawi pakarangan, risampune nahen kaplungguhang taler tan katitenin kengin kataban tur kasadokang ring prajuru. Prajuru wenang niwakang pamidanda lan prabea karusakan utawi karugian manut pararem.
- (3) Prade wawalungan inucap jantos ngletihin genah suci, sajawaning pamidanda mwang karugian kadi munggah ring ayat (2) wenang taler kawewehin antuk pamidanda pangupakara kahyangan inucap manut kabuatan.

Pawos 29

- (1) Tan kadadosang ngangonang utawi negulang wawalungan ring margi, rurung, setra, pakarangan banjar utawi telajakannia.

- (2) Sowang-sowang kulawarga tan kadadosang miara asu ring pakarangan lintang ring asiki, asu punika patut kadagingin cihna marupa kalung. Sang mamurug wenang keni pamidanda manut pararem.

Pawos 30

- (1) Tan kalugra ngalumbar ayam ritatkala warga desa ngawit matatanduran utawi matajuk mawaneng 15 (limolas) rahina.
- (2) Sang madrebe tegal pabianan patut masadok ring sang madrebe ayam malumbar ritatkala jagi ngawitin matanduran.
- (3) Prade risampun masadok, taler kantun wenten ayam malumbar wenang sang madrebe pabianan ngejuk ayam inucap tur nyadokang ring prajuru desa utawi banjar. Prajuru patut niwakang panepas utawi pamidanda manut pararem.
- (4) Sapasira ugi tan kalugra ngejuk utawi mademang paksi miwah sakancan buron sane patut kaayomin ring wawidangan Desa Pakraman Panca Mandala Gita, sajaba sampun polih lugraha saking prajuru desa utawi sang ngawiwenang. Sang mamurug wenang keni pamidanda manut pararem, utawi katur ring Guru Wisesa.

Kaping 5

Indik Bhaya lan Dusta

Pawos 31

- (1) Sahananing laksana tan rahayu sane ngawinang pikobet, dukkita, duskerta ring jadma siosan kasinanggeh bhaya. Sang malaksana sane ngawinang bhaya kabawos dusta.
- (2) Bacakan sane kabaos bhaya, luire:
 - ha. Jiwa bhaya : kaamuk, kabaak, lan kaparikosa;
 - na. Artha bhaya: kamalingan, kabegalan;

- ca. Geni bhaya: katunuan utawi puun;
- ra. Toya bhaya: anyud katiben arus;
- ka. Bhayu bhaya: katiben linus.

Pawos 32

- (1) Warga desa sane katiben bhaya patut digelis matur supekса ring prajuru utawi sang wenang mawosin.
- (2) Sang katiben bhaya utawi sang manggihin kawentenan bhaya kapatutang nyuwarayang kulkul manut wigunannia saha digelis matur supekса ring prajuru mangda sang katiben bhaya gelis katulungan.
- (3) Sahanan warga banjar utawi desa patut sayaga maweh pitulung saha makta piranti manut kawentenan bhaya inucap.

Pawos 33

Prade wenten warga desa kamalingan, patut digelis matur supekса ring prajuru desa miwah ring Guru Wisesa mangda tan kantos kasep ngetut kawentenan dusta inucap.

Pawos 34

- (1) Sahanan jадma sane malaksana dusta ngawinang bhaya, taler kangkat katur ring guru wisesa manut bobot kaiwangannia.
- (2) Prade dusta ngawinang kaletahan genah sane kasinanggeh suci, wenang pamidandannia kawewehin antuk pamrayascita manut kabuatan.
- (3) Sang malaksana duracara ring agama, prade kacihnan manut Tri Pramana, patut katiwakin pamidanda manut pararem.

- (4) Yan wenten warga desa malaksana duskreti astha capala, pada capala, wak capala ring warga siosan yaning kawicarayang tur prasida kabuktiang, sang malaksana patut keni pamidanda manut pararem.
- (5) Prade laksana inucap nibenin warga sane kapasinggihang manut agama, patut pamidandannia kawewehin pamrayascita marep ring sang katiben manut kabuatan.
- (6) Prade ring sangkepan utawi ring pura wenten jadma nguman-uman wyadin kroda, patut katiwakin pamidanda saha pamrayascita manut pararem.
- (7) Prade wenten dusta saking dura desa, patut kaejuk tur katurang ring Guru Wisesa.

Kaping 6

Indik Pangunyan Desa

Pawos 35

- (1) Rikala wenten krama desa ngwangun karya utawi yadnya suka utawi duka, patut polih panyanggra utawi pangrombo saking krama desa manut pararem.
- (2) Panyambrama utawi pisuguh ring krama desa rikala mapitulung, kamargiang manut dresta.
- (3) Sajawaning pamargi panyanggra utawi pangunyan manut dresta, krama sane madrebe lalangan patut ngaturang tatangguran, santukan rumasa pinaka tangan sukuning desa.

**CATURTAS SARGAH
SUKERTA TATA AGAMA**

Palet 1

Indik Dewa Yadnya

Pawos 36

- (1) Pura-pura sane wenten ring Desa Pakraman Panca Mandala Gita luire:
 - ha. Pura Kahyangan Tiga, makadi Puseh, Dalem, Bale Agung utawi Pura Desa.
 - na. Pura-pura Mrajan utawi Pajenengan.
- (2) Pura Kahyangan Tiga kasungsong olih Desa Pakraman Panca Mandala Gita.
- (3) Pura mrajan utawi pejenengan kasungsong olih pangemponnia sowang-sowang.
- (4) Piodalan ring pura-pura inucap kalaksanayang nyabran 6 sasih apisan utawi
• manut dresta sowang-sowang.

Pawos 37

- (1) Ring sowang-sowang pura patut kaadegang pamangku sane yogya ngenterang, nuntun, utawi ngastawayang sahanan yadnya ring pura inucap marut kawenangannia.
- (2) Sane patut kasudi dados pamangku luire:
 - ha. Krama Desa Pakraman marep utawi sane sampun nyada;
 - na. Tan cedangga, tan buta aksara;
 - ca. Maparipolah rahayu;
- (3) Dudonan nyudi sang pacang kaadegang pamangku, sakadi ring sor!
 - ha. Mawiwit saking katurunan pamangku sane sampun-sampun;
 - na. Malarapan antuk nyanjan;
 - ca. Saking sasudian.
- (4) Dudonan pacang dados pamangku luire:

- ha. Kararemin olih krama;
 - na. Nyuciang raga utawi mawinten kapuput olih sulinggih;
 - ca. Ngupašaksiang raga tur nunas waranugraha ring pura katodya tur kaprabeyanin olih sang ngadegang.
- (5) Sane tan wenang dados pamangku luire:
- ha. Jadma cedangga utawi maduwe panyungkan ngalahlah;
 - na. Jadma sane maparipolah tan rahayu;
 - ca. Sang tan kararemin antuk krama.
- (6) Sang kasudi dados pamangku riwus puput pawintenannia patut ngamargiang dharma kapamangkuan, tur patut kasinggihang olih warga desa manut wigunannia.

Pawos 38

Swadharmaning pemangku lwire:

- ha. Asewakadharmas, astiti bhakti ring Ida Bhatara Sasuhunan, utamannia ring Ida Sanghyang Widhi Wasa;
- na. Ngenterang, ngastawayang sahananing upacara rikala patirtaan utawi yadnya siosan ring pura utawi ring paumahan krama manut pinunas;
- ca. Ngawekasang rikala wenten krama ngaturang punia, punagi mapanawuran utawi nunas karahajengan ring pura;
- ra. Ngalaksanayang pamargi sane mabuat suci ring pura, pamekas rikala nedunang utawi ngalinggihang pralinggan Ida Bhatara;
- ka. Nuntun krama lan warga Desa mangda satata bhakti ring Ida Sang Hyang Widhi tur malaksana susila manut agama.
- da. Nyiratang tirta majeng ring krama utawi warga desa.

Pawos 39

- (1) Sahananing aturan utawi sasangi marupa artha, laluwesane mule-mule muah sakaluirnia patut kadruwe antuk pura inucap
- (2) Sang pacang maturan, mapanahuran sakadi inucap ring ajeng patut masadok ring prajuru mangda kaungguhang ring ilikita sasampune kaastawayang olih pamangku.
- (3) Sakancan aturan ring ajeng wenang kaanggen ring pura manut tatujon.
- (4) Sahanan sarin canang ring Kahyangan Tiga patut kepah tiga, sowang-sowang bagi katiba ring pura inucap, pamangku muang Desa Pakraman.

Pawos 40

- (1) Pamangku kagentosin malarapan antuk:
 - ha. Seda;
 - na. Sangkaning pinunas jero mangku santukan lingsir, utawi sungkan rahat;
 - ca. Kanorayang olih krama riantukan malaksana dusta.
- (2) Prade jero mangku kawusanang sangkaning malaksana dusta patut pamangku inucap ngwaliang sahananing piranti kapamangkuwan sane karaksa.
- (3) Prade jero mangku malih ngalap rabi sangkaning rahayu, patut pamangku inucap malih nyepuh raga tur katodya olih prajuru sahananing prabeyannia kamedalang olih pamangku inucap.
- (4) Yening jero mangku desa utawi pecak pamangku desa sane tan kanorayang seda, patut polih wantuan saking krama desa manut pararem.

Pawos 41

- (1) Kahyangan kasinanggeh kadurmanggalan, prade:
 - ha. Katiben panca bhaya;
 - na. Kasiratan rah tan pasangkan;

- ca. Karubuhan taru;
 - ra. Sander kilap;
 - ka. Kahanan lulut sakaluirnia utawi kahanan simbar;
 - da. Kahanan wangken jadma utawi wangken sato ageng;
 - ta. Dados genah jadma masanggama.
- (2) Kasukertan Kahyangan kamanggehang kadi ring sor:
- ha. Sahanan krama lan warga desa patut tureksa, nyanggra, mangda kasukertan Kahyangane tan kaletahan.
 - na. Sane tan kalugra ngranjing ka pura luire:
 - 1. Sang kantun sebel ring raga manut jalarannia;
 - 2. Sang kantun cuntaka sangkaning madrebe kulawarga seda utawi nyambutang karya pitra yadnya manut sengker;
 - 3. Jadma sane sinanggeh patita makadi: panak babinjat, beling tan wenten ngangkenin, tan kasinangaskara, jadma buduh, sakit ila, muang sakancan cendala siosan sadurung polih pamrayascita manut sastra agama;
 - 4. Sato ageng sajawaning rikala mapepada;
 - 5. Sang mabhusana tan manut ring tata susila ngranjing ka pura;
 - 6. Sang makta saluiring barang sane kabaos leteh manut agama;
 - 7. Sahanan sane kabawos ngletehin manut pararem.
 - ca. Laksana sane tan kawenangang ring pura luire:
 - 1. Masumpah utawi nahap cor, sajawaning saking pituduh prajuru;
 - 2. Maulah ala, maujar ala wak parusya;
 - 3. Marebat, mayuda punapi malih jantos wenten ngamedalang rah;
 - 4. Mecikang wastra, nyangsang bhusana, mecikang pusungan lan sapanunggilannia, sajaba Ida Sang Sulinggih;
 - 5. Mawarih, makoratan, macecepin rare;

6. Sirep masarengan lanang kalawan istri, pamekas sang sampun kasinanggeh deha truna.
- (3) Yan mabukti wenten jadma malaksana ngaletihin sakadi kecap ring ajeng patut keni pamidanda manut pararem. Prade laksanakan kabaos banget ngaletihin makadi: mayuda jantos metu rah, masanggama, makta barang letih, kahyangan inucap patut kaprayascita sapatutnia. Sang malaksana keni pamidanda lan prabea pamrayascita manut pararem.
- (4) Yaning wenten kahyangan desa keni kadurmanggalan, pamangku utawi sang manggihin patut digelis nyadokang ring prajuru mangda marumang krama pacang ngawentenang pangupakara sapatutnia.
- (5) Yen wenten jadma buduh jantos ngarusak pura, inggihang punika palinggih utawi sane siosan, kapatutannia patut mecikang sahanan sane karusak tur keni pamrayascita manut pararem.

Palet 2

Indik Resi Yadnya

Pawos 42

Indik Resi Yadnya ring Desa Pakraman Panca Mandala Gita kamargiang manut dresta lan sastra agama.

Palet 3

Indik Pitra Yadnya

Pawos 43

- (1) Sahananing upacara pamretekana sawa kabaos Pitra Yadnya.
- (2) Yan wenten warga utawi krama madrebe kulawarga seda, kangkat ngambil pamargin sakadi ring sor:

- ha. Kapendem manut dresta;
- na. Makingsan ring pratiwi utawi ring geni, prade pacang kaplebonang sadurung tutug fahunan;
- ca. Ngararis kaplebonang manut uger-uger padewasan.

Pawos 44

- (1) Gaguat mendem sawa sakadi ring sor:
 - ha. Genah mendem utawi ngeseng ugi mangda ring setra, yan rare ring setra bajangan;
 - na. Yan rare durung apupak sane seda, wenang kapendem pramangkin tan ngawilang dewasa, nanging yan sampun lintang ring apupak patut nganutin padewasan;
- (2) Padewasan mendem kapidabdabin olih prajuru desa.
- (3) Tan wenang mendem sawa rikala rahina: Pasah, Purnama, Tilem, Semut Sadulur, Kala Gotongan mwang rerahinan siosan manut pararem.

Pawos 45

- (1) Prade wenten warga desa lampus rikala wenten wali ring sinalih tunggil paibon sane wenten ring wawengkon Desa Pakraman Panca Mandala Gita, kangkat kapendem riwus pujawaline puput kamargiang yadiastun durung panyineban.
- (2) Yan nuju piodalan utawi wenten karya ring Kahyangan Desa utawi Kahyangan Jagat sane wenten ring Nusa Penida wenten warga desa seda, kangkat makingsan ring pertiwi pramangkin, nanging pamargine sasiliban tan paswara kulkul tur tan nganggen gagumuk. Pamrateka sapatuting pamendeman wenang kamargiang risampun pula-pali karyane puput tur manut padewasan.

- (3) Yan wenten warga desa seda rikala wenten yadnya ring kahyangan jagat luaring Kecamatan Nusa Penida, pamargine mendem utawi mreteka sang lampus, kalaksanayang nganutin piteket saking Parisada utawi Guru Wisesa.

Pawos 46

- (1) Krama utawi warga desa sane seda sangkaning salahpati, ulah pati lan sapanunggilannia ring luaring karang paumahannia, kengin kabakta budal, tur kaprateka sakadi patut nanging patut kasanggra antuk banten pangulapan mwarig panebusan.
- (2) Tan kawenangang mendem sawa sane makta bobotan sadurung bobotannia kaembasang.
- (3) Yan wenten jadm padem tan kailingan ring wawengkon Desa Pakraman Panca Mandala Gita tan wenang kapendem ring setra Desa Panca Mandala Gita, patut kaaturang giring Guru Wisesa. Upacara pamrayascitta kaletihan desane kamargiang olih desa.
- (4) Yan wenten warga desa padem ring tegalan, patut sang madrebe waris sang padem ngalaksanayang pamrayascita pacaruan sanistannia amanca warna utawi manca sata, kalaksanayang ring genah inucap mawaneng sadurung asasih pitung rahina.

Pawos 47

- (1) Swadharmaning krama lan prajuru rikala wenten kalayusekaran:

ha. Krama sane kaduhkitan:

1. Patut digelis masadok ring kelihan banjar, saha nunas tatimbang indik kawentenannia.
2. Nunas pangrombo ring krama banjar, manut kabuatan.

3. Ngaturang panyambrama pisuguh sakasidan majeng ring krama sane rauh ngrombo karya manut dresta.
- na. Prajuru Desa Pakraman sasampune polih pasadok, patut:
1. Maritatas tatujon pamargin sang kaduhkitan;
 2. Nyuarayang kulkul manut tatujon, raris ngenter pamargin krama sajeroning ngremba karya wiadin pamargin patus manut dresta.
- ca. Krama banjar patut:
1. Ngrombo sang kaduhkitan sapatutnia manut dresta;
 2. Maweh patus saha ayah-ayah manut pidabdab sane kararemin.
- (2) Rikala nyandang utawi nanggung sawa, wadah mwang upakara sane siyosan, pamargine ka setra patut mangda dabdab tan kadadosang magarap-garapan jantos ngawinang pikobet sang madruwe karya.
- (3) Rikala nyanggra upacara krama sane seda pacang kapendem, krama banjar wiadin desa patut mangda nganggen busana adat madya. Yan rikalaning atiwa-tiwa utawi ngaben patut nganggen bhusana adat jangkep tur tan kapatutang mabungah-bungahan, nanging sang nanggung wadah mwang patulangan kadadosang nganggen bhusana adat madya.
- (4) Sang mamurug utawi piwal wenang keni pamidanda manut pararem.

Pawos 48

- (1) Sang kasinanggeh kahanan cuntaka luire:
- ha. Sang kalayusekaran utawi kapademan;
- na. Sang nyambutang karya Pitra Yadnya, ngawit nanceb tataring.
- (2) Sengker sebel wiadin cuntaka manut jalarannia sakadi ring sor:
- ha. Ngaraja sewala jantos wusan ngamedalang rah, tur mersihin raga;
- na. Ngembasang oka, sane istri 42 rahina, sane lanang 12 rahina;

- ca. Karuron, kulawargannia sapakarangan jantos 42 rahina, nanging kulawarga warisnia sios pakarangan wantah 3 rahina;
 - ra. Sangkåning kalayusekaran, sang ngarepin miwang krama banjar jantos puput ngatelunin (nigang rahinin);
 - ka. Yening sane seda anak alit durung kepus pungsed, kulawargannia sapakrangan manggeh cuntaka jantos 42 rahina.
- (3) Prade wenten krama wiadin warga desa padem rikala sampun nyambutang karyz utawi yadnya ring Kahyangan Tiga, sane wenang nyuntakayang wantah sang ngarepin sareng pangapitnia kemawon.
- (4) Sane kamanggehang tan keneng cuntaka luire:
- ha. Ida sang sulinggih;
 - na. Pamangku Kahyangan Desa manut sasana kapamangkuan.

Pawos 49

- (1) Sawa sane wenang kaabenang wantah sawan sang sampun apupak utawi sampun maketus untu. Yan durung apupak nanging sampun lintang ring 3 sasih, kawenangang wantah ngelungah.
- (2) Krama sane pacang ngamargiang atiwa-atiwa kapatutang mangda nuduk patus manut babanjarannia.

Pawos 50

- (1) Ayah-ayahan utawi pakaryan patus rikala wenten atiwa-tiwa luire:
- ha. Ngaresikin utawi ngabas margi rauh ka setra;
 - na. Makarya rerompok;
 - ca. Makarya tatakan api utawi prapen;
 - ra. Makarya bale pawedaan;
 - ka. Ngaryanin wadah muang eteh-ete sane siosan;

- da. Ngarombo karya jantos puput nganyut;
- ta. Karya siosan manut paigum lan pangenter prajuru.

Pawos 51

- (1) Krama sane pacang nampi patempung ngabenang sawa saking desa siyosan patut masadok dumun ring prajuru sadurung ngawit ngambilang karya.
- (2) Prade patempung inucap kalugra olih prajuru, sang matempung kapatutang nawur pakenan-kenan ka Desa Iwiripun: Panukun setra, pananjung batu, mwan pangungkab lawang akehnia manut pararem.
- (3) Sahananing aturan ring pura sane mawiwit saking pangungkab lawang panukun setra, pananjung batu, panebas atma, manggeh dados druwen desa tur patut kaunggahang ring ilikita.
- (4) Pamangku ring Pura Dalem patut polih pah-pahan aturan inucap manut pararem.

Palet 4

Indik Manusa Yadnya

Pawos 52

- (1) Manusa Yadnya inggih punika upacara dharmaning manusa saking patemoning kama bang kalawan kama petak sajeroning garbhawasaning ibu jantos lampus.
- (2) Upacara inucap kamargiang manut kecap sastra agama mwan dresta, simacara sane kamanggehang ring Desa Pakraman Panca Mandala Gita mwan pakulawargan sowang-sowang.

Palet 5

Indik Bhuta Yadnya

Pawos 53

- (1) Bhuta Yadnya inggih punika sahanan upacara pabeyakalaan ring perthiwi, kahyangan, mwang ring sarwa bhuta kala.
- (2) Upacara – upacara pabeyakalan ring sarwa prani luire:
 - ha. Ring sarwa tumuwuh, nemonin Tumpek Wariga;
 - na. Ring sarwa prani utawi ingon-ingon, nemonin rahina Tumpek Uye;
- (3) Upacara pabeyakalaan ring perthiwi, kahyangan lan sarwa bhutakala kabawos caru utawi tawur, manut agung alit upakarannia.
- (4) Sajaba upacara Bhuta Yadnya kadi kecap ring ajeng, taler kamargiang upacara pabeyakalaan ring manusa manut wiguna.

Pawos 54

- (1) Rikala tileming sasih Kasanga, ring wawidangan Desa Pakraman Panca Mandala Gita taler kamargiang Bhuta Yadnya pacaruan kadi ring sor:
 - ha. Ring pempatan desa caru Manca Sata;
 - na. Ring pura-pura Desa mwang banjar manut dresta kamargiang caru Eka Sata;
 - ca. Ring sowang-sowang paumahan utawi pakarangan upakarannia segehan manca warna 9 tanding, olahan daging ayam brumbun sane katunas ring sowang-sowang banjar, segehan agung atanding maulam jejeroan bawi mentah lan patabuh.
- (2) Sorennia kamargiang pangarupukan pabuu-buu, kapidabdabin olih prajuru, ngawit sandikawon tan kengin lintang ring tengah wengi.
- (3) Benjangnia kamargiang catur brata panyepian luih ipun:
 - ha. Amati geni, tan dados nguripang geni;

- na. Amati karya, tan dados mambilan karya;
 - ca. Amati lalungan, tan dados malalungayan;
 - ra. Amati lalungan, tan dados maramen-ramen maliang-liang.
- (4) Pamargin catur bratane katuntun olih prajuru manut desa kala patra, tur ngawit lan ngalebar brata inucap kacihnayang antuk suaran kulkul.

PANCAMAS SARGAH
SUKERTA TATA PAWONGAN

Palet 1

Indik Pawiwahan

Pawos 55

- (1) Pawiwahan, inggih punika panunggalan purusa lan pradana malarapan panunggalan kahyun sukacita kadulurin antuk upasaksi sakala lan niskala.
- (2) Pamargin pawiwahan sane kapatutang ring Desa Pakraman Panca Mandala Gita luire:
 - ha. Papadikan, kadasarin antuk kahyun sukacita mwan paigum kulawargan sang purusa mwan kulawargan sang pradhana tur kawiwitin antuk pakarsan saking sang purusa;
 - na. Marangkat utawi Ngarorod, kadasarin antuk kahyun sukacita sang kalih lanang istri tur pamarginnia sasiliban;
 - ca. Nyeburin utawi Nyentana, pamarginnia pateh ring papadikan, nanging kawiwitin antuk pakarsan saking sang wadhon sane pacang kaadegang pinaka sentana rajeg.
- (3) Sahananing pamargi pawiwahan sakadi kocaping ajeng patut mangda nganutin kecap Awig-awig Desa Pakraman Panca Mandala Gita lan Undang-undang Perkawinan tur kaupasaksi antuk prajuru desa miwah Guru Wisesa.

- (4) Sahananing pamargi pawiwahan kadi mungguh ring ajeng wenang polih cihna swaran kulkul manut dresta.
- (5) Prade sajeroning rangkat wenten pamalaku utawi pangaluku kantos ping tiga during kapuputang olih kulawargan sang wadhon utawi sang pradhana, kulawargan sang purusa kawenangang nyadokang pandidikan punika ring prajuru desa. Prajuru wenang mawosin saha ngicen pamuput.
- (6) Yan wenten jadmata saking dura desa ngarorod ring sajeroning Desa Pakraman Panca Mandala Gita, krama sane nampi patut digelis masadok ring prajuru. Prajuru raris maritatas kawentenan sang ngarorod inucap, prade pamargine sampun manut patut polih pasayuban, yan tan manut tan polih pasayuban utawi pangayoman.
- (7) Pamargi nyeburin sampun kabaos puput yaning sampun ngamargiang upacara pawidhi widhanan manut dresta.

Pawos 56 ✓

Gagwat sang pacang mawiwaha sakadi ring sor:

- ha. Sampun munggah deha teruna;
- na. Sangkaning pada rena;
- ca. Manut kecaping agama;
- ra. Yan ngambil sios agama patut kamanggala antuk upacara sudhiwadhani;
- la. Mangda nganutin pidaging Undang-undang Perkawinan.

Pawos 57 ✓

- (1) Pawiwahan sane kapatutang ring Desa Pakraman Panca Mandala Gita sakadi ring

- ha. Sampun kamargiang pabeyakalaan lan pawidhi-widhanan saha kaupasaksi sakala niskala tur kapuputang antuk pandita utawi pamangku; ✓
 - na. Wenten upasaksi saking prajuru desa; ✓
 - ca. Sampun matengeran suaran kulkul; ✓
 - ra. Sampun kailikitayang. ✓
- (2) Pawiwahan sane tan manut sakadi kecap ring ajeng nenten kabawos patut.

Pawos 58

Sapasira pacang ngawarangang kulawargannyane patut masadok ring prajuru indik pamargin pawarangane.

Pawos 59

Yan wenten sinalih tunggil krama desa pakraman kicalan oka istri, patut ngamargiang pasaserep, tur kapidabdabin sakadi ring sor:

- ha. Sang pacang masaserep patut masadok rihin tur nunas panuntun ring prajuru desa;
- na. Sang masaserep patut ninutin sapituduh prajuru makadin ipun:
 1. Rikala ngaranjing ka umah krama siosan tan dados langkung ring kalih diri;
 2. Tan kengin makta salwiring gegawan;
 3. Tan kengin maparilaksana lan mabawos sane tan patut.
- ca. Prajuru patut midabdabin pamargin sang masaserep mangda panetes trepti saha anak istri inucap polih nguningayang pайдikan ipun. Pidabdab pamaritatas kamanggehang sakadi ring sor:

1. Anake istri mangda magenah ring inange, kirang ring tigang depa tan kalugra anak sios nganampekin, tatujone mangda tan kemad ngaturang païndikannyane ring sang maritatas;
 2. Prajuru desa mratyaksayang pangangken sang istri rikala pacang niwakang pamutus. Yan pada harsa sang ngrorod, saserepe patut matulak. Yan sangkaning kapaksa sang lanang patut katiwakin pamidanda manut pararem tur sang istri kapalasang saking genah inucap.
- ra. Yan masaserep ka desa pakraman siosan patut polih uwak-uwakan saking prajuru genahe masaserep.

Pawos 60

Yan wenten anak istri deha mobot sadurung alaki rabi, patut kadabdabin sakadi ring sor:

- ha. Yan sane lanang ngangken madrebe pakardine tur kantung teruna kautsahayang mangda prasida mawiwaha.
- na. Prade sang lanang tan suka ngambil sang istri sane mobot punika sang lanang patut keni pamidanda manut pararem. Pamargi salantur ipun katur ring Guru Wisesa. Risampun rarene embas patut kaprateka sapula-pali manut agama olih sang istri.
- ca. Yan sang lanang sampun alakirabi ngangken madrebe bobotane tur anake lanang sanggup pacang ngambil sang mobot, pinih rihin patut polih uwak-uwakan saking rabine kapertama tur polih ijin saking Pangadilan Negeri.
- ra. Prade sang istri sane mobot paling pangangkene tur matujuang anak lanang sane kasenengin, nanging sang kadalih nenten ngangkenin indike punika, patut kamargiang padewasaksian, tur prabeyannyane kamedalin antuk sang

- mobot. Risampun rarene embas patut kapahayu sapula-pali olih sang istri manut Agama.
- ka. Prade' sang mobot nuapaksa pangangkene, patut sang mobot marisuda desa tur keni pamidanda manut pararem, indik punika kabawos nuke anyud patigrape. ✓

Pawos 61

Sahananing krama sane sampun alaki rabi, prade wenten riyet ring parabiannyane, sang istri raris ngambul ka umahnyane pecak utawi ka umah anak sios jantos 6 sasih suwennyane, yan sang istri wenten kahyun pacang ngarorod malih, pamarginnia patut nganutin Undang Undang Perkawinan.

Palet 2

Indik Nyapihan

Pawos 62

- (1) Pawiwahan kabawos palas malarapan antuk pamargi sakadi ring sor:
- ha. Palas marabian santukan sinalih tunggil seda mapiteges balu lanang utawi istri;
 - na. Palas marabian mawiwit antuk wicara kabawos nyapihan.
- (2) Pamargi nyapihan kasinanggeh pastika ring desa pakraman risampune:
- ha. Molihang pamutus saking Pengadilan Negeri;
 - na. Kadambyakan olih prajuru sajeroning paruman.

Pawos 63

Krama sane nyapian kapidabdabin sakadi ring sor:

- ha. Nawur prabeya ring paruman, akehnia manut pararem;
- na. Polih pah-pahan pagunakayan.

- ca. Pabekelan mawali ndiri-ndiri;
- ra. Warisan kakuasayang olih sang purusa,
- ka. Patut maweh pangupajiwa mwang kaweruhan ring sentanannia sane wetu saking parabiannia.

Pawos 64

Prade riwekas sang nyapian macihna adung malih tur pacang mawali alaki-rabi, kapatutang sakadi ring sor:

- ha. Malih ngalaksanayang pawiwahan manut pamargin pawiwahan ring ajeng,
- na. Keni pamidanda manut pararem saha kadulurin banten pamrayascita. ✓

Pawos 65

(1) Balu luh sane katinggal lampus olih suaminnia, utawi balu pecak nyeburin, patut ngamargiang swadharmaning balu sakadi ring sor:

- ha. Ngamargiang patibrata, tan paradara utawi dratikrama;
- na. Ngaraksa, ngutsahayang lan miara sahananing warisan lan pagunakaya, kalih sentanannia;
- ca. Tan kengin ngadol, ngadeang, utawi makedihang warisan sawawaning polih kabebasan saking kulawargan rabinnyane saking kapurusa.

(2) Balu sane kabawos tan pageh ring swadharmaning balu luire:

- ha. Matingkah dratikrama, paradara lan sapanunggilannia;
- na. Matilar tan pasadok jantos langkung ring 6 sasih;
- ca. Lempas ring swadharmaning balu.

(3) Balu sane tan pageh ring swadharmaning balu kadi kocap ring ajeng, prade kacihnan manut Tri Pramana (bukti, ilikita, saksi) salah prawertine, kengin katundung olih kulawargan lanange.

Palet 3

Indik Sentana

Pawos 66

- (1) Sentana kabhinayang dados kalih pawos luire:
 - ha. Pretisentana, teges ipun sentana sane metu malarapan antuk pawiwahan sane patut;
 - na. Sentana paperasan teges ipun sentana sane kamolihang majalaran antuk ngedih utawi meras kacihnayang antuk arthabrana mwanng upacara pamerasan tur kadulurin upasaksi sakala lan niskala.
- (2) Yan wenten krama desa madrebe oka lanang adiri tan kapatutang makedihang okannyane kaperas olih kulawarga siyosan dwaning pamargi punika kabawos ngencak patus.

Pawos 67

- (1) Sang pacang meras sentana patut masadok ring prajuru asasih sadurungnia, tur patut ngawentenang pasadu arep ring kulawarga warisnia.
- (2) Bendesa Pakraman patut digelis nambyakang ring krama sajeroning paruman indik rencanan sang pacang meras sentana.
- (3) Yan wenten kababatan mangda digelis nyadokang ring prajuru masengker tigang wuku sadurung pamerasan kamargiang.
- (4) Bendesa Pakraman digelis mawosin saha ngicen panuntun utawi panepas manut catur dresta mwah awig-awig lan pararem desa.
- (5) Ngadegang sentana patut macihna antuk artabrana paperasan saha kasaksiang antuk prajuru warga lan waris tur kamanggehang ring ilikita olih prajuru.

Pawos 68

Pamerasan patut kamargiang sakadi ring sor:

- ha. Sane patut kaperas kaanggen sentana, kapertama waris kapurusa, yan tan wenten, kengin saking wadon tunggal sanggah, yan taler tan wenten kengin sakama-kama utawi sakita kahyun nanging patut polih lugraha saking waris kapurusa utawi warga padadyaan;
- na. Upacara pamerasan patut kasaksinin olih prajuru saha kapuputang olih sulinggih, utawi pinandita;
- ca. Sasampune upacara pamerasane puput, prajuru desa patut nambyakang sajeroning paruman.

Pawos 69

- (1) Swadharmaning sang meras sentana pateh sakadi swadharmaning guru rupaka luire:
 - ha. Maweh pangupajiwa;
 - na. Ngupakara manut agama;
 - ca. Maweh saha ngutsahayang kawruhan;
 - ra. Ngupadi karahajengan manut patitis grehasta lan sapanunggilannia.
- (2) Swadharmaning sang kaadegang sentana pateh kadi swadharmaning pretisentana.
- (3) Sang rumasa tan polih pamargi kadi kecaping ayat (1) lan (2), patut digelis masadok ring prajuru. Prajuru patut midabdabin sang kalih mangda mawali eling ring swadharmaning sowang-sowang.

Pawos 70

- (1) Sapasira ugi pacang ngerobang utawi ngajak jatma saking kulawarga siosan patut masadok rihin ring prajuru.

- (2) Krama sane ngajak utawi ngerobang patut sumakuta negegang saparilampah sang karobang arepe ring sukertan desa pakraman.
- (3) Prajuru patut ngungguhang pasadok inucap ring ilikita saha nambyakang sajeroning paruman desa.

Palet 4

Indik Warisan

Pawos 71

- (1) Warisan inggih punika sahananing artabrana saha ayah-ayahan sajeroning ngupadi sukerta sakala niskala saking kaluhurania arep ring katurunannia.
- (2) Sane kasinanggeh warisan lwire:
 - ha. Druwe tengah turun-tumurun saking kaluhurannia, artha brana, sanggah pamerajan, tanah ayahan, pusaka lan sapanunggilannia;
 - na. Pagunakaya;
 - ca. Hutang piutang.
- (3) Wawu kengin kabawos warisan prade wenten:
 - ha. Sang mapiturun kabawos pawaris;
 - na. Katurunannia kabawos ahli waris;
 - ca. Artabrana miwah tategenan lan ayah-ayahan kabawos warisan.

Pawos 72

- (1) Ahli waris luire:
 - ha. Pratisentana purusa;
 - na. Pratisentana wadon sane kamanggehang sentana rajeg;
 - ca. Sentana paperasan.
- (2) Prade tan wenten sakadi kaucap ring ajeng, sane kasinanggeh ahli waris, salantur ipun ipun makadi:

- ha. Papernahan kapurusa ngunggahang makadi rarama, pekak, rerama dimisan, dimindon lan salanturnyane;
- na. Papernahan ka samping makadi misan, mindon lan salanturnyane.

Pawos 73

Swadharmaning ahli waris sakadi ring sor:

- ha. Ngamargiang sahanan ayah-ayahan pawaris;
- na. Ngutsahayang artha brana warisan;
- ca. Ngempon kahyangan, merajan lan pura tatinggalan pawaris saha ngupakara;
- ra. Ngalaksanayang sahanan Pitra Yadnya leluhur;
- ka. Muputang utang piutang pawaris.

Pawos 74

(1) Warisan wawu dados kepah olih para ahli waris risampun:

- ha. Muputang Pitra Yadnyan pawaris;
- na. Nahurin saluir utang pawaris;
- ca. Nyeledihi sahanan ayah-ayahan pawaris;

(2) Prade sajeroning pakulawargan wenten pedum waris patut:

- ha. Kawntenang paigum indik pedum waris inucap;
- na. Yan tan prasida igum, patut katunasang tatimbang ring prajuru desa;
- ca. Prade taler tan wenten cumpu ring tatimbang prajuru desa wenang katunasang ring Guru Wisesa.

(3) Sane tan patut polih pahpahan warisan lwire:

- ha. Santana sane alpaka guru;
- na. Sentana sane sampun nilar agama Hindu;

- ca. Sentana lanang sampun kesah mawiwaha nyeburin.
- (4) Sane kapatut polih pah-pahan warisan pamupon kemawon, luire.
- ha. Deha tuwa, sang mulih deha, mwan sang mulih teruna dwaning pecak mawiwaha nyeburin;
- na. Balu luh sane kantun ngamanggehang swadharmaning balu.
- (5) Pawaris rikala kantun maurip kengin mapaweweh marep ring okannia sane istri sane pacang kesah mawiwaha marupa:
- ha. Jiwadana utawi pabekel tetadtadan;
- na. Paweweh padgatakala;
- ca. Paweweh warisan siosan yan sampun wenten manah adung ring ahli waris sane wenten.

SADTHAS SARGAH

WICARA LAN PAMIDANDA

Palet 1

Indik Wicara

Pawos 73

- (1) Sane wenang mawosin mutusang wicara ring Desa Pakraman Panca Mandala Gita inggih punika prajuru desa utawi Kerta Desa.
- (2) Prade wenten wicara tan prasida ngamolihang pamutus ring Desa Pakraman, sang mawicara kengin nunas pamutus ring sang rumawos utawi Guru Wisesa.

Pawos 76

- (1) Sahananing wicara sane mawiwit saking laksana corah, sane kasinanggah nungkas ring awig-awig utawi pararem, patut digelis kabaosin olih Prajuru tan

- (2) Sajawaning wicara kadi kocaping ajeng, prajuru wenang maosin risampune wenten pasadok saking sang nunas bawos.
- (3) Panepas saking prajuru patut pastika nyantenang iwang patut malarapan antuk Tri Pramana, luire: saksi, ilikita, lan bhukti, tur taler tan maren nepek ring Catur Dresta, makadi: sastra dresta, purwa dresta, loka dresta muang desa dresta.

Palet 2

Indik Pamidanda

Pawos 77

- (1) Desa pakraman wenang niwakang pamidanda majeng ring warga desa sane sisip.
- (2) Tatiwak pamidanda inucap kamargiang olih Bendesa Pakraman.
- (3) Bacakan pamidanda, lwire:
 - ha. Ayahan panukun kasisipan;
 - na. Danda arta marupa dedosan saha panikelnia miwah panikel urunan-urunan sane siosan;
 - ca. Rerampagan;
 - ra. Kadaut tanah ayahannia;
 - ka. Pamidanda siosan manut pararem.
- (4) Agung alit pamidanda sane katiwakang manut panglokika kasisipannia.
- (5) Sahanan jinah utawi artha brana pamidanda, patut karanjingang dados druwen Desa Pakraman Manca Mandala Gita.

Pawos 78

- (1) Yan wenten sinalih tunggil krama langkung ring tigang paruman utawi tigang sangkepan tan nahur paturunan utawi dedosan, wenang kabligbagang manut pararem.
- (2) Tata cara nglak sanayang pangrampagan manut kadi ring sor

- ha. Kamanggala antuk pasadok, saking prajuru marep ring sang pacang karampag;
 - na. Ngrampag kalaksanayang olih prajuru, kasarengin olih krama pinaka saksi lan pangrombo pinih akeh 5 (limang) diri;
 - ca. Sang ngrampag mangda sangkaning darsana ngambil barang utawi nyawenin tanem tuwuh akehnia manut agung alit utang sang karampag;
 - ra. Sahananing sane karampag patut kaunggahang ring ilikita tur kasaksiang;
 - ka. Prajuru patut miteketin sang karampag mangda digelis nebas sadurung waneng asasih;
 - da. Jinah lelangan barang sane karampag kaanggen nuku utangnia ring desa pakraman tur kawewehin antuk prabeya pangrampagan, sisannia kawaliang ring sang karampag.
- (3) Tan kawenangang ngarampag barang sane kainggilang manut agama miwah sane mademang pangupajiwana sang karampag.
- (4) Pamidanda kadi ring ajeng pastika purna buntas, yening sang sisip sampun:
- ha. Nunas geng sinampura ring krama sajeroning paruman, riantukan purun nguak pasubhaya;
 - na. Nawur pamidanda panguak pasuara duk pacang karampag.

SAPTAMAS SARGAH

NGUWAH-NGUWUHIN AWIG-AWIG

Pawos 79

- (1) Nguwah-nguwuhin awig-awig puniki kalaksanayang antuk paruman krama Desa Pakraman Panca Mandala Gita.
- (2) Paruman inucap patut kadasarin antuk gilik saguluk paigum pararem krama banjar.

- (3) Pamutus babawosan prasida kamanggehang yaning sampun madasar antuk kayun silik saguluk, utawi madasar antuk pawilangan suara prade tan sida gilik-saguluk.
- (4) Prade pamutuse madasar antuk wilangan suara, gaguatnia patut sakadi ring sor:
 - ha. Katah krama sane parum tan kirang ring kalih pah tiga saking pigungan desane sami;
 - na. Pawilangan suara sane nganutin sanistan ipun satenga langkung adiri saking katah krama sane parum.

Pawos 80

Rencana paruman indik pacang nguwah-nguwuhin awig-awig kadi kocaping ajeng, kengin kamedalang antuk Bendesa Pakraman, Kelian Banjar utawi saking krama ndiri-ndiri.

ASTAMAS SARGAH

SAMAPTA

Pawos 81

- (1) Awig-awig puniki kawastanin Awig-awig Desa Pakraman Panca Mandala Gita.
- (2) Awig-awig puniki manggeh kalaksanayang ring wawidangan Desa Pakraman Panca Mandala Gita.
- (3) Awig-awig puniki kamargiang ngawit saking kararemin antuk Desa Pakraman Panca Mandala Gita.
- (4) Awig-awig puniki nganinin sahananing warga lan krama desa, miwah sakaluiring sane kakuwub antuk Desa Pakraman Panca Mandala Gita.



Pawos 82



- (1) Sakaluring pamargi sane wenten sadurungnia patut kaanutang ring sadaging awig-awig puniki.
- (2) Pamargin pakraman sane durung kabaos sajeroning awig-awig puniki, manggeh kalaksanayang manut tata cara sane sampun ketah mamargi, kaduluran antuk pararem desa.



Pawos 83

- (1) Awig-awig puniki kararemin sajeroning paruman krama Desa Pakraman Panca Mandala Gita duk rahina Sukra Pon Kulantir, ti., tang., ping, 8, sasih Kasa, rah, 6, tenggek, 2, Isaka 1926 tanggal Masehi 25 Juli 2004.
- (2) Awig-awig puniki kalinggatanganin olih Prajuru Pakraman Panca Mandala Gita mwang para Kelihan Banjar sawawengkon Desa Pakraman inucap, saha kasaksinin olih para manggala praja dinas makadi Kepala Dusun, Kepala Desa Kelumpu, Camat Nusa Penida pamekas Bupati Klungkung maka murdhaning pamikukuh.
- (3) Lwir sang ngalinggatanganin:

ha. Prajuru Desa Pakraman mwang para Kelian Banjar:


Bendesa Pakraman Panca Mandala Gita

I Wayan Sukla

1. Kelian Banjar Baledan Duur


I Made Putet

2. Kelian Banjar Iseh


Putu Raka